

Su Casu Romanu devet èssere fatu cun late de berveghes sardas

In Sardinna su Casu Romanu si faghet dae sos ùrtimos annos de su 1800. Aiant cumintzadu sos industriales romanos cando, in su 1885, su sindigu de Roma non lis aiat perìtidu prus de amurjare in intro de s'Urbe e deretu aiant sighidu unos cantos caseifitzios toscanos e napoletanos ca in Sardinna non mancaiant nen late e nen sale.

Oe su Romanu est su casu prus produidu in Sardinna, subra 550.000 cuintales 300.000 o prus si faghent a Romanu, e est finas su casu berveghinu a DOP prus bèndidu in totu su mundu.

Custu casu non si faghet in Sardinna ebia ma finas in su Lazio, e in sa provìntzia de Viterbo.

Sa produtzione est regulada dae unu "disciplinare" chi istàbilit comente devet èssere fatu. Su Consòrtziu de su Casu Romanu lu diat chèrrere cambiare. Tra sas àteras cosas, pro sa prima borta, una parte de su Consòrtziu cheret inditare in su "disciplinare" sas ratzas de berveghe. A bandas de su late de sas ratzas autòctonas istòricas, e duncas sa Sarda ma finas sa Vissana, Sopravissana, Comisana, Massese e cussa de s'Amiata, cheret pònnere in mesu, pro fàghere a casu, finas su 10% de su late de berveghes de àteras ratzas.

Oe b'at de nàrrere chi non b'at peruna làcana e duncas totu su late de berveghes pesadas in Sardinna podet èssere impreadu pro fàghere su Romanu. Cheret a nàrrere finas chi su late de berveghe de custas ratzas istranzas no est prus de 8 miliones de litros, su 2,5% de totu su late chi si murchet in Sardinna.

Duncas si diat colare custa proposta si diant podent cazare 20 miliones de litros de late de berveghes istranzas a Romanu. In custa manera si daet unu sinnu negativu ca est comente a nàrrere chi si cherent pesare berveghes istranzas in logu de cussas sardas. In su tempus sas istranzas ant a èssere semper de prus cun s'arriscu de pònnere in perìgulu sa berveghe Sarda.

Ma no est solu custu. Confagricoltura est contrària a sa proposta de su 10% finas ca solu ponende late de sas ratzas autòctonas istòricas si podent amparare su sabore e sas calidades ùnicas de su Casu Romanu.

Su Romanu at cussu sabore distintu ca est fatu cun late de berveghes chi paschent a s'abertu e mandigant s'erva de sas pasturas sardas. E duncas si non mantenimus sa berveghes locales e

pesamus cussas chi sunt agorradas e pesadas a mangimes non b'at a àere prus diferèntzia intre su late, e duncas su casu, cazadu in Sardinna e cussu traballadu in Frantza, Ispanna o in cale si siat àteru logu. Oe su consumadore est semper prus atentu a su benistare animale, a su chi mandigant sos pegos e a sa calidade de sos màndigos. Duncas est de importu a mantènnere su ligàmene intre territòriu, pastura, late e casu.

Solu in custa manera si podet amparare su Romanu dae sas menetas, dae sas istrochiduras e dae sa cuncurrèntzia dè àteros casos fatos in Grecia, Turchia e Bulgaria.

Oe in Sardinna si murghent prus o mancu 320 miliones de litros de late, de custos 200 miliones si faghent a Romanu. Duncas late bi nd'at de avansu dae sas bervegges sardas. Non si cumprendet pro ite si devet pònnere cussu de àteras bervegges chi diat cambiare sa calidade e su sapore de su Romanu. In prus b'at de azùghere chi non si podet sighire a aumentare sa produtzione de Romanu. Ocannu che semus zai a 340.000 cuintales, sos annos colados s'inditu pro mantènnere s'istabilidade de su mercadu fiat de nde fàghere 280.000. Onzi borta chi nd'ant fatu prus de cussu chi su mercadu pediat, su prèju est minimadu e de conseguèntzia sos industriales ant pagadu prus pagu su late a sos pastores.

Tocat de isetare a su 12 de ghennarzu de su 2022 pro biere ite disinnat s'Assemblea de sos sòtzios de su Consòrtziu.

B'at isetu finas pro àteras chistiones chi pertocant su "disciplinare" chi pro sa prima borta inditat gastas noas de Casu Romanu: *Extra* chi at a zùghere prus pagu sale, *Riserva* chi at a chèrrere lassadu assutare nessi pro 14 meses (ma finas 18-20-24-30 meses) e *Montagna* de late de bervegges pesadas in cuiles postos subra sos 600 mètros de artària subra su mare.